



's Annemarie.

Annemarie, dhu nor nedd so
Als dehdichd Dich scheniere,
Bischd doch selbschd am mähnschde frooh,
Daß Deiⁿ Hannes wirrer do,
Dich zum Danz se fiehre;
Draus die Weibzleid in de Fremd
Uffgedunnerd, gladdgekämmd
Arme wie die Reiche,
Kähns, deß Deer dehd gleiche.

Haschde aah e Schdrumwelkobb
Bischde doch meer liemer
Als e uffgeleggdi Bobb;
Du, midd dem nußbraune Bobb,
In Deim Baamwollbiwer;
Wer so Nahe hat wie Du,
Un so Bäckelcher dezu

Un e Perschemeilche
Brauchd kähⁿ Roos, kähⁿ Beilche.

Guck noor, wie die Schleehe blieh
Un die Weirekätzjer,
Wie die Wisse all so grie;
Kumm geh' midd noor, sollschd mol sieh'
Wääß e häämlich Plätzje;
Wo de Gaarde negschd am Enn
Schdehd e Holler im Gelänn,
Waß der aah dhud siehe,
Der, der iß verschwiehe.

Wann die Frucht dehääme iß,
Dhun mer Hochzig halle.
Herrgodd, sollen uff de Wiß
Kakekebb un Bellerschiß
Bollre do un knalle;
Hochzig wie im Ord noch kähⁿ
Achd Daah soll nedd die Gemäähⁿ
Sammd 'm Phillb, 'm Krumme,
Außem Zummse Krumme.

Wisse solls die Weld un sieh',
Daß trotz all' de annre

's Sahnehoofer Ann'marie
Ich, de Bäärehannes, frieh'
Der serick vum Wannre;
Dausend Gille in de Dasch,
's beschde Drebbche in de Glasch
's Annemarie im Aarem — — —
Wer sitz noch so waarem?

